

摘藻堂四庫全書薈要

集部

欽定四庫全書薈要卷一萬九千四百五十八集部

皇清文穎卷五十七

詩

四言古詩

賜遊湯泉應

制有序

徐元文

山阜既結爰有神泉陽氣攸鍾是成溫谷類能消
疴滌煩澄懷澡德蓋寒燠之所以交宣二儀之所

以妙物也遵化州西北四十里有山曰福泉溫泉
出焉按水經注漁陽郡北有溫泉即其地也林巒
茂挺洞壑迴環雄扼闕城密護

陵寢榮光於以繚屬王氣由之結蟠地脈敦龐川原秀
潤是以白雲上合丹砂下閔融為炎液流為暄瀾
比龍池之迅騰譬神鼎之長沸

太皇太后翟輅式臨

睿情加泰

皇上欽承

慈指啟宇庀工去雕甍綺疏之壯麗追堯階舜牖之淳樸因仍舊址攸躋攸寧惟二十年春二月以

皇后山陵大禮臣等扈從至馬蘭峪

皇上始至虔謁

孝陵望松路以遥酸對幽巖而隕涕具臣陪列悽愴不勝方待事石門遂閱旬日三月己未

命大學士臣明珠

召臣霽等二十有二人

賜遊茲泉并宣

諭所以修繕之意濯清漱芳逍遙永晝味同甘醴色若
玻瓈周以貞珉承以蓮蕊涵碧虛而方折吸溟渤
之飛流靈液徐清曲溜旁駛玉龍驤首吐納分滙
神皋勝地斯云至矣夫甘泉賦於永始曲水序於
元嘉以及華清豫遊九成避暑類皆登陟之勝視
聽之娛尚思揚厲篇章褒成休美況我

皇上展孺慕於

陵園奉色養於

眉壽而事不煩民動無侈費詎非邁軼往古式訓將來
者乎臣竊不揆弁鄙謹賦詩十二章章八句其音
節未諧乎六義於以美盛德之形容或庶幾於萬
一云爾

皇清受命覃制萬方威傾月窟德浸扶桑紫濛入貢窮
髮來王際天罄地歸我旼章

龍門蘭峪是稱佐輔昔惟邊鄙今也庭戶

陵宮言言考卜其所比洛瀍邛方雍霸杜

我

皇純孝通明洞幽展謁

園寢神愴涕流仰瞻弓劍祇奉松楸靡高不即靡深不
求

從龍崇山逶迤濬谷環迴岡原如拱如伏碧樹芊眠彤
雲陸緝迄彼溫泉實湧巖麓

靈砂內沸陰火潛然蒸為暖液奮迅盤旋輪衝轂轉雪
瑩珠圓色澄空碧氣馥蘭荃

陰陽陶甄剛柔摩盪幽贊神功疇能測量湯谷溫源暄
波灼浪曩聞其名茲燭厥狀

祥以類感符以兆形地不愛寶神泉效靈蠲疴保性駐
老扶齡瓊膏甘露孰與比馨

翠華來巡爰滌爰盥浴德澡躬跼蹐永玩

王母介福禕衣有煥思挹靈漿上綿

慈算

乃濬洪源清池泱泱乃甃文石疏溫納涼引之不竭沃
之彌盈千春永御壽愷樂康

自昔湯泉恒聞臨幸水殿岐陽烟宮驪嶺浴日騰波蒸
雲結影雅詠餘鏗奎章垂炳

景從千官星馳六飛何如我
皇致孝

宮闈雕欄繡柱壁砌瑤墀何如我

皇崇儉立規

惟孝格天惟儉作則小臣來觀式誦嘉德神運無方
聖功不息迓祉凝休於萬斯億

聖德神功詩有序

汪霏

皇帝既躬率禁旅再犁北庭大敗厄魯特之衆於拖諾
山

天威所臨電擊風掃遺孽逋亡假息窮壤復念除惡務
盡不大創則不永寧於是具糗糧簡卒伍開道置

頓百務具飭需春乃發歲二月北巡

駐蹕狼居胥山臨邊授律諸將帥稟受進止蓋至是

六龍凡三駕矣噶爾丹潰北之餘烏獠獸賊其脅從諸
部相繼乞降勢窮技盡計無復之子既就俘身亦
隨斃自茲窮海以西大漠以北荒遠不經職方未
載之地永無有私立名號以外於聲教者而數十
年之逋寇以平五月振旅還

京師自王公以迨士庶匍匐歡迎於道者交臂接踵不

可以數計

皇帝乃饗

廟飲至與民休息遐邇禔福神人以和太平之業靡有
紀極猗與盛哉臣竊窺前史自古帝王戡定僭亂
著有武功往往載在簡冊然或詢老成之謀或假
武臣之力非必獨決成謨躬歷險遠即有功烈皆
淺薄不足道猶且鋪張揚厲侈為僅事獨厄魯特
之役羣臣狃於故常咸以為窮荒小醜不足勞

萬乘發言盈廷如出一口

皇帝睿慮先覺果斷不疑必欲

親蒞行陣一舉而廓清之洎乎聲罪伐謀摧堅擣虛制
勝機宜如燭之照如數之計合節應期不爽銖寸
謀定於數年以前功成於萬里之外然後知

大聖人之所作為謀臣宿將有不能窺測其萬一者且
大功克集不以永清者定鳴一時之盛而勵精求
治彌懷永圖辭鴻號而不居歸成功於

眷命惟獎廉懲貪右文重道務使四海之廣千萬年之
久咸沐浴於詩書仁義之域隆矣至矣功德之盛
自循蜚疏乞以還所未嘗有也臣生際昌期覩赫
赫之偉烈遭逢之幸千載一時而自被知遇以來
得簪筆懷鉛廁侍從之列及充乏成均又以經籍
教導為職雍容揄揚記載休美以傳示萬世者史
臣之責也其敢以不文默而自已敬譔

聖德神功詩一篇凡千有二十四字極知詞義無陋不

足塵

睿覽亦庶以盡文章報國之分云爾其詩曰

皇帝受命統一區宇惟位乘乾惟日當午聲教暨訖悉
臣悉主大德函覆溫肅順序跂行喙息物各得所孰於
其間狡逞角距是惟北荒有矇者瞽德威明明闇曾無
睹介恃險遠豕突蟻聚創剝餘孽未伏質斧

帝車三驅盡犁其部二庭遂空屬國安堵搜株剔根俯
若拾取不有頑梗曷彰

神武繫噶爾丹實惟兇豎隨牧轉徙旃裘湮乳舊通職
貢十百其旅假竊寵靈雄長磧鹵貪若饕餮暴若貔
磨牙噴毒擇肉而咀弱為強食積骸成莽肆力并兼城
以千數爰震其隣及我藩輔勞而來奔告敗惻楚桓桓
天朝萬物父母一夫不獲曷慰冒怙乃頒

詔旨開示心膂來享來庭一視公溥爾無憤盈縮甲則
可彼昏卒狂阻兵樂禍

帝用赫然震電馮怒詢謀於廷積習是徂咸請擇帥往

任勦撫

帝曰咈哉予其致果諏日親征

郊祀用牡是造是宜是類是禡遣告河嶽百靈效助六
飛晨動帛訇天鼓龍旗烏章日月其羽獸盾犀扎珠弓
玉璫期門伏飛導騎駢駢元戎啟行張翼二拒中權自
將決勝樽俎白旄在右黃鉞在左列缺奔驅屏翳環扈
豐草爭茁靈泉乍吐師行洸洸采入其阻止如山岳動
如風雨或顛其巢或燔其貯或殲其酋或殪其侶或扼

其角或折其股有觸必摧有衝莫禦遂蹴祈連回望杓
斗瀚海蕭條天幕四野謀來告言賊竄近數

天兵躡之睥眄束手

廟算先覺寇必西走設覆犄角潛扼隘口猝遇我軍魄
褫膽墮式遏歸奔如獵狐鼠馘彼闕氏餘衆繫虜遺畜
盈川棄甲成阜渠魁僅免假息穴土

帝曰還師六月徂暑予其少息休此士伍滅跡掃影以
俟後舉朔塞風高順時冬狩大閱車徒益峙糧糗秣馬

厲兵置頓建堡誓告師期堅冰迫剖韎韐躬親屢習勞
苦遂出雲中遂踰寧夏雪塞飛狐風寒石虎谷暗沙鳴
懸車束馬

帝實先之曰予率汝鑿空開道遮險伏弩駐狼居胥屯
營業我天羅四周逃死無處維彼逆子既繫以組既檻
以車俘致

闕下維彼脅從棄逆來附丁壯面縛婦稚背負賊失其
黨若蛭離駟若蛙在井若魚在釜天絕其命身首潰腐

盪滌氛祲鞏固牧圉六師凱旋永紓北顧上自王公下
迨黎庶夾道而跪迎

帝鹵簿踴躍歡喜式歌且舞飲至告成典禮洪鉅蕩蕩
巍巍功無與耦崇上

尊號屢表勿許中外喁喁延頸以佇

皇帝至聖紹堯績禹覆燾無私羣生和煦興廉任能惠
及鰥寡天錫

皇帝誕受純嘏太平之符登陟三五

金史四庫全書
卷五十七
皇帝至神宣聰作

后邃慮前知神識內守大化疾馳覃被九有天錫

皇帝百福單厚民物恬愉竝躋仁壽

皇帝允文萬象在宥天章粲然星雲融冶登山勒銘饒
削礪硃功成作歌以南以雅天錫

皇帝於樂燕胥丹鳳赤鱗起應搏拊

皇帝允武太阿手拄剪除三孽截彼海浦奄有漠北八
荒庭戶鞭笞萬里無敢齟齬天錫

皇帝候尉齊軌越裳獻雉肅慎貢楮

帝德之廣覆載宏普

帝德之運升恒永久福謙報祉神所相予師克屢豐庶
徵時叙登封云亭考古垂矩明堂辟雍文德藻黼臣率
國子舊職訓詁洋洋

廟謨具在冊府

帝載烜赫臣辭燭火紀績歌功震耀萬古

平蜀詩十三章 有序

朱彝尊

臣伏見

皇上即阼以來仁風溥洽凡在海外重譯來格邇者巴蜀負固叢爾叛寇神人交憤六師所向何堅不摧我

皇上先之以德化未即咸劉乃亮渠既殞餘孽罔悛天威赫怒爰

命虎臣分軍而前采入其阻日未浹旬保寧成都千里底定正月丁巳捷書上

聞誕集文武臣工宣於

闕下僉曰蜀寇之不靖於今六稔

皇上休養民力湛靜不紱

金鏡在握朗照萬里之遠山川險易瞭若掌中

廟算恢宏指授方略以師則武以時則利以將相則和
調用能不日成功

聖武布昭遠邁隆古臣以布衣被蒙

恩澤拔置史館粵稽曩昔劉闢既擒韓愈進元和聖德

詩明之平蜀劉基亦作頌以獻臣雖蒙滯躬逢盛

際於以頌揚丕烈其何敢後乃拜手稽首而獻詩

曰

皇帝聖哲靡遠弗瞻南詣北變西被東漸蠢爾不庭憑
阻滇黔爰踞巴蜀以逞戈鋌

皇帝曰咨元戎是勅欲宣武功誕敷文德冠衆來挑我
堅壘壁匪久其師恤民之力

民力既恤士氣孔揚我車我牛我倉我箱芻茭菽粟在

獻在岡萬夫豫附萬馬騰驤

魁渠肆殄梟謀日沮

帝曰可哉命整雲旅分鑣以馳揚旌負羽或搃其吭或
擊其脅

赫赫奮威師度七盤既下葭萌入閬中闕桓桓勇略烏
道鈎援綿井既收遂復錦官

如彼東瀛用注螢爝如彼衝風用卷秋籜昧雉斯經窮
獸乃縛徹其幟竿清我堠柝

蜀之黃髮植杖以遨蜀之黃口連臂而謠壺則有漿簞
則有醪或佚於野或迓於郊

迺疆迺理檜林棘路爾宅爾田輕爾徭賦巴貢其賤寶
輸其布棧谷梯山千里褰泝

捷書遠奏達於

宸聰午門斯啟宣示羣工小大稽首蹈舞攸同庭燎晷
晷光如日中

我出我師正月初吉至於益都魯不旬日矯矯虎臣殆

罕其匹

帝心是嘉首用遷秩

人亦有言師克在和惟此成功

廟算實多貳者勿族降者勿苛

皇仁之溥四海是毗

井絡既平坤垠式奠蒙詔牂牁載歸赤縣

皇帝神武俾修組練亦有昆池於焉習戰

聖有恒訓儆戒無虞凡百有位職思其居勿謂外寧官

守或渝小臣作詩以贊訏謨

皇清文頴卷五十七

欽定四庫全書會要卷一萬九千四百五十九

集部

皇清文頴卷五十八

詩

四言古詩

神功聖德詩

高士奇

皇帝聖德與天為一日照月臨稟朔奉職博恩普施歛
福建極魁柄獨握宏綱自挈風流令行心搏志戢有獎
者順有誅者逆昔奮大討鋤剪三孽以次銷鑠如湯沃

雪海島逋寇波濤濶絕戈船濯征版宇式闢四方救寧
德教洋溢馳義沙外震威漠北罔不欽承孰敢僭越附
塞款關範我繩尺曰惟

皇仁是生是植乃茲蠢頑荒獷弗率性資豺狼情狀鬼
蜮咆勃氣勢負恃膂力雄長外區并吞諸國與彼同壤
咸被侵軼駕言尋讐用恣饕餮鉤爪鋸牙擇肉而食鹿
斯之奔無地伏匿扶服來歸仰我存恤我

皇如天矜此饑踣煦之陽春俾遂生息兇渠叫呶假釁

開隙怒其臂螳以犯天殛翺飛近邊窺伺疆索命帥爰
逐將殄而逸我

皇曰咨是當撲滅匪寧天弧妖星誰射大興六軍自將
擊賊丙歲之春卜日諏吉禡牙誓師有虔秉鉞虎賁期
門禁衛積卒石鎧金甲琱戈畫戟二矛重弓龍盾鶴膝
寶劍長鎗犀剗蛟截千乘萬騎焜耀赫奕朱旗烏章隼
雲拂霓月驥天駟玉環珠勒逸熊飛鳬趨迅滅没星陳
天行輿輦雜沓俞騎先路王良執策爰陟邊庭聿渡沙

磧壁壘精嚴亭障修飭魚麗鶴鵠張箕舒翼陳圖兵機
皇猷允塞風雲龍虎變化出入兵揚九霄迥瞰巢窟蚩
蚩醜徒虺蟠蟻結忽臨天兵落膽奪魄相攜竄奔欲避
鋒鏑我

皇曰嘻汝竄奚適既張之羅復掩之罟果逢右拒奮勇
電擊大呼以鏖陷堅破敵冰刃俱絳鐵衣盡赤棄骸谷
量獲械山積妻孥戮俘厥魁倖脫築封長鯨京觀帶嶼
王師聿班候屆炎熱我

皇曰嘻滅寇可尅惡木遺根有肄必茁鋤深剔幽務絕
株檠於茲歲冬

法駕再出巡邊涉河朔方駐蹕灼獸之窮計慮惶惑乞
援他邦覲助單于迺

命諸將分兵控搃凡要害區戈鋌林立鞞譯所通萬里
傳檄汝皆我臣毋右噐慝聞風仰流卑會赤帝請効職
貢乘黃茲白嗟汝賊黨脅從伊感譬如昆蟲仰望膏澤
淪棄荒昧不見白日曷不我歸恩豈汝惜

詔書煌煌沁腑浹骨髓羣相歡告有感以泣扶老提幼叩
轅匍匐我

皇曰咨茲可軫惻

賜之食飲授以祿秩熙陽太和德漬幽蟄款附纍纍鴉
音竝革賊勢離散尚逞剛愎遷延不降罪大心怵鼎之
沸魚日就煎逼肯容游魂寬誅漏刻復於今春三整師
律榆中右轉靈武西接川原曠蕩嶺嶂率大河坤隅
蘭錡四列宣威定謀盡殄回適兩甄竝進霆轟颶疾自

彼氏羗胥我爰即古之伊州今日哈密乳麋是經迺捕
而繫獻諸天家檻致京闕巨憝震驚破卵傾穴汝子已
擒誰汝親暱區落潰叛左右離逖鞠頑不振乞活無術
坐膺斧膏行就車裂徬徨窘縮惴恐股栗服毒自殺悔
禍靡及部黨內附大造埏埴自西旋師早洞情實河湟
上源遠泛舟楫沿波順流以示恬謐首惡果殲奠此反
側中途凱歌烝庶悅懌龍荒廓清日朗天碧成
神聖功昭文武烈斷自

宸衷匪藉參決商輶不征民賦不益師不久淹役不再
籍憂勤一身自朝至夕冰霜歷踐風雨沐櫛山險水淖
宵躋曉涉與衆均勞焦思倍切日親萬幾從容不迫窮
幽絕遐燭以濬哲計程按期若合符節邀遮縱禽百無
一失彌此封狐鞭箠絕域安民荅天視古勲百八表同
風六宇合轍皇哉堂哉惟天與埒飲至告

廟刻銘勒石空前軌躅為後法式微臣扈行職司珥筆
頌颺

天聲傳千萬億

聖武遠揚青海平定詩八章有序

楊椿

臣聞聖哲之君建非常之績垂光載籍者若詩皇
矣叙伐密伐崇殷武常武紀荆楚徐方來享來庭
之盛其事咸炳耀赫濯昭爍今古伏惟

皇帝陛下即位以來覲光揚烈丕冒四表近又不十五
日蕩平青海用兵之神成功之速推校往昔莫可
倫比誠宜播諸聲歌丕顯無前之偉業臣椿職司

載筆竊不自揆恭撰平青海詩八章謹拜手稽首
以獻

赫赫我

皇惠茲西土

命將徂征桓桓其旅爰類爰造爰宜爰禡左之右之無
不恭者一章

皇謂帥臣汝師於邊式和爾軍以撫遠人甘松高高洮
水滔滔我撫我招我弓是櫜二章

彼昏不悛輕蹈我疆如豕斯突如鴟斯張勝之兩川師
武之力師武之力惟

皇之德三章

皇德彰止我武孔揚青海茫茫我

天子是疆乃震乃攝乃伐乃克我敵則劉我降伊釋四
章

其降既多或咏或歌攜厥髻耆襁負娑婆煦之育之
天子輯之百萬之衆一朝納之五章

烏蘭之西噶斯之北是巢是窟是傾是踣將士一心咸
奮仇仇賊遠遯逃潛踪域滅六章

皇師奏凱三月之朔自我出師月哉生魄我行未久我
功聿多我功既多

天子攸嘉七章

天子嘉止惟西陲有成西陲有成

皇心載寧乃爵乃賞乃播德音薦之

郊

廟慶我太平八章

乾隆四年

聖駕南苑大閱恭紀有序

張照

臣謹按詩三百篇采薇出車杕杜文王時詩也後
遂為周天子命帥凱旋飲至之樂章江漢常武宣
王時詩也美宣王同淮夷平徐戎若夫太平無事
安不忘危寓習武於田獵因以大閱甲兵於傳有
春蒐夏苗秋獮冬狩之文有艾草為防纏旃為門

戰不出頃田不出防之典此皆成康之遺規文武
之方策也而文武成康時竝無詩惟傳成有岐陽
之蒐而已至宣王時乃有車攻吉日之什豈當周
盛時每歲行之故為常事不書歟抑舊有篇什而
逸之也或曰彼茁者葭壹發五祀于嗟乎騶虞是
即文王春田閔武之詩而後世遂以為燕射樂章
記曰天子以騶虞為節是也其殆然歟我

國家

聖聖相承重熙累洽

皇帝敬

天法

祖勤政親民庶績咸熙萬方咸寧乾隆四年十一月大
闕於南苑率由舊章布昭

聖武神靈歡喜耄艾歌咏夫周宣太平之業未足比成
康也今日軼成康而上之奚問周宣乃車攻吉日
之篇美宣王復古之績流耀古今列於學宮其在

三百篇外者又有石鼓之文為今昔詞人心艷口語嗟非後世所幾及夫

君上有盛德大美十百周宣而臣子學不逮古不足以發揚騰踔垂示萬世與車攻吉日等詩比士大夫之恥也雖然老人擊壤童子歌衢寂寥短章寧得與後世詞人賦頌絜其文采而唐哉皇哉若日月之俯視衆星則繫乎堯德之大而不繫乎老人童子之文辭也明矣依此以譚則雖以臣之不文其

亦可以有述歟爰拜手稽首而獻詩曰

於鑠

皇清萬國玉帛亘地罄天咸登衽席七德既宣橐籥
甲春風春雨大化翔洽

三后在

天若堯舜禹我

皇嗣服乃文乃武法

仁皇仁遵

憲皇憲揚

列祖烈受

上天眷雖雖在

宮肅肅在

廟秉耒耜田橫經學校緝熙單心終始典學力是聞知
忘其先覺敷政優優不剛不柔萬類咸若以育以休田
疇耕耨車牛服賈士一行義工用規矩八風孔時雨暘
寒燠夏葛冬裘左飢右粥惟

帝曰咨四海晏清繫于苞桑先民有經天生五材利用
厚生廢一不可誰能去兵百歲不用一日莫忘羸縮變
化與神同方招搖之下天下良樂其勝以慈其生以弱
利適器至用敵教盡處女脫免由練由訓乃詔司馬作
我六師南有甫草駕言泣之如荼如火如雷如電如箕
如翼如江如漢白羽咽原霜鋒照野千旂霞翻萬馬波
瀉馬止陣合斑其相紛五色陸離百花發春
帝乃大徇迺拊迺勉

聖日華耀金支宛轉暉暉禁旅伋伋元戎悉率左右天子是從鼓動而進鉦動而礮一線燭絕玉女巧笑萬霆怒擊大海濤奔烟埃漲天若雲非雲九進九伐礮乃連環好整以暇儀靜體閒九天之上動於無朕九地之下守於無眵烟開日明鳥虎蛇龍其餘握奇偏伍彌縫設右為牝益左為牡九方七圓周旋無究演陳既畢整旋舒舒若雲歸山震懾依烏

帝乃釋甲還

宮大賚投醪挾纊一時虎拜

皇帝神武在於不殺守在四夷未嘗用鉞若子歸母若
肢護首若川并海若無運有我以我仁彼識彼義四海
萬年異人同氣旗纛旄麾干戈咸揚惟以習勞無伐可

張學士

臣照

三朝禁直載撫金管詠歌

盛德

乾隆三年

聖主躬耕藉田詩有序

聞棠

乾隆三年中春之吉

皇上巡行東郊率羣后躬藉千畝重民事也列辟卿士
咸仰勤政務本之至意作為詩歌吟詠德化臣辭
語淺薄不足以美盛德之形容顧侍從之臣職以
文辭自效詎敢闕如敬拜手稽首頌詩十章以附
歌衢擊壤之末詩曰

皇帝在宥播物咸植如春斯融如雨斯澤歲功其初農

事孔亟居高履卑用示民則其一

太史順時於古有訓春陽沮洳地氣含醞睠焉郊畿德
乃廣運趨民於勤風本自近其二

民之服疇耕鑿比比帝力不知顧我疆理春無遺勤秋
有厚侍詎忘先勞羣動斯起其三

東方少陽星殷朱鳥祠官滌除田令潔兆飛廉屏翳夙
與清道蕃蕪庶生職是泰媪其四

天田一星象

帝之藉元風恢恢靈澤奕奕箕揚其精牛奮其軛惟農
丈人亞若主伯其五

帝御六駕賁于郊廛澹澹流水翳翳遠烟蟄戶初啟春
人尚閒周覽物化穆然德淵其六

春疇載融膏脈營腠三推有儀禮義耕耨庶氓終之雨
決雲驟施生化工天付我

后其七

躬稼既畢

帝盱曰咨九鴈農正竝毋後時爾食爾力爾田爾治爾
瞻南畝甘雨來思其八

神皋蔥曠風日多暇麥秀黍華膏露如瀉染新醴甘以
薦

廟社於屢豐年歛幽飲蜡其九

猗歟我

皇敬德作所田功越周溝洫循禹沐膏詠勤聖作物覩
於萬斯年承是福祐其十

聖駕東巡

盛京恭謁

祖陵大禮慶成詩有序

汪由敦

臣聞奉先思孝必隆報本之祀懷永圖艱必宏述
祖之典是以景員松柏藻歌商楹高山漆沮騰軌
姬籙闡祚由其卜昌釐風以之歸厚於皇

聖清俛天錫美拓迹開統重光緝熙若水降祥之地繞
樞電而湛星虹橋山閔兆之都擁熊羆而蔭雲物

瑤臺巖嶮外大國之幅帙皇澗滌洄篤公劉之締
構珍符欲集宇宙構其氤氲運會將開山川鬱其
磅礴神皋與區福地昌衢創古迄今靡得倖焉巍
巍

天陵天設地成左遼右瀋

盛京建焉九鼎既奠是為陪都狹沛里而陋譙鄉掩
媯墟而輶郛室三垣晷晷天街分箕尾之躔九野
芒芒地險跨幽營之趾削成長白抗終南太華之

峯沆漭渾同滙溫洛滎河之氣俗泰華胥風厚幽
野形勝天府華實上腴赫矣壯乎斯太紫之殊庭
坤靈之寶域也若其重軒雙闕之麗參塗九市之
殷千廬八屯之周百廛萬雉之密桀乎隱隱與

京師同制展足以奉

陵邑而固

皇基隆上都而觀萬國者乎我

皇上燕天嗣構敬日凝圖襲恩累愛之化成稽古憲章

之烈盛協氣之所翔遊淳化之所甄治文明之所
震耀聲教之所布濩淪深格高暢垓沔挺景鑠鴻
祐殊徽茂祉穰穰簡簡磴磴即即百年膺慶鍾明
備之期七世恢基考

祖宗之德固已道藹配京勲照紹庭矣猶以象耕靈隧
展軫之路方遙龍鼎幽宮升香之禮未舉蒼蒼畢
隴鬱鬱春郊永言

弓劍之遺有積露霜之愴昔我

皇祖躬勤三巡有恪執事上以崇本報功答

列聖在天陟降左右之眷下以覲岳省方知民風土俗
王業艱難之自斯乃

國家舊章

神聖遠圖不可闕也歲在昭陽月旅夷則登穀告期載
嘗佇典

皇上乃奉

皇太后發軔紫宮清埃遶左黃麾紫蓋出霄甸而馭風

雷赤帑金貂扈煙途而序鵷鷺靜

帷宮於綠野仍勤問膳之儀肅

帳殿於黃圖尚展含飴之樂桑麻或或夾

輦路而鋪芬黍稷與與委珍阡而縵錦若乃取材講事
順時令而耀威神舉柴收禽贊梁鄒而登俎器諒
軌物之所經豈遊娛之為壯於是風馳霧集長驅
虎踞之鄉天旋雲游直指龍飛之宅桑梓依然粉
榆在望

眸容有穆孝享用蠲洞屬幽喻肅雖顯詔官職有序駿
奔秉德黃纛玉豆告嘉栗於

靈阿金支秀華接

神存於誅蕩蒼雲布地豐融享右之符蕭光燭天晦藹
淵祥之貺於斯時也穆穆焉皇皇焉愛慈咸致優
愜若接騰漢典於視奩跨唐規於獻服者矣既而
存問高年採訪謠俗酌褒鄂之陪瑩徧方望之羣

祀

御總章

布綸綍中陽白水仍沾賜復之歡羽琤鈞臺共飮愷樂
之燕所以承

靈億而擁休嘉隆孝熙而示慈惠也爾乃七駟厲飾肅
禁旅而習威儀三表鳴銑稽政典而明坐作軍容
以禮成大閱以義舉因斯以誓泰武於遐外懽威
稜於藩維震疊之用斯宏柔懷之經彌遠然後振
旅神都迴麾雲嶠千旌鳳轉翊

大輅而前驅萬騎龍趨遵康衢而復路邦基有維岱之
安

鼎業有如岡之福懿鑠之蹟猗歟煒哉且夫追遠格

祖配天綏嘏鴻慶也時邁車攻觀風會同茂典也大禮

大樂神人允若治本也乃文乃武威福率土化權

也用能經綸萬樞雍動八表道凝克紹垂衣馳玉

檢之功義極如存指掌謚珠囊之運比巡遊於往

事則汾射韜芬第嘉頌於從臣則卷阿避德臣沐

浴

元化叨塵近侍雖未獲參扈

清蹕而竊幸遭逢

盛典遠希生民皇矣思文清廟之作雍容揄揚降慕長
卿孟堅退之子厚之篇鏗錡炳耀輒採古意勉課
末音謹為雅詩十五章上獻詩曰

昊天有成命集我

皇清爰降

帝女錫朱果以茹篤生

藝祖肇是愛新庇陟衍緒長白導源運啟高山鬱鬱
永陵峻極於

天一章

赫赫

太祖勃興東土甲士十三我仇是殲既殄我仇我戎孔
脩羣凶沸騰

王師濯征殪厥戎首方域以寧九姓推止五部歸止覆

育列國

帝號徽止 二章

天祚大邦遼水之陽既溥既長考卜惟

皇曰時曰止於瀋之渙宅是

盛京萬年攸始 三章

明綱既隳四路集師

皇奮其武天戈一麾五日三捷大

皇清之業誕受四國巍巍

福陵垂裕萬葉四章

太宗嗣服仁濡義肅平壤漠漠朝鮮臣伏杏山
直直直明師載覆如飈斯馳至於青兗匪利天下
弗劉弗翦五章

武功既輝文明喬皇乃創國書乃秩典章八蠹
央央百僚蹌蹌使鹿使犬重譯來王於昭

昭陵長發其祥保人斯無疆六章

皇矣

世祖統一九區式睠舊京肇啟

帝圖景亳生商豐鎬造周元戎禁旅卿尹府僚以衛山陵以固

皇都七章

越我

聖祖六飛三臨用展孝誠翼翼以興大朝鄴宮思滂景從亦越我

世宗來覲於東

三后在天肸鬯昭明不顯不靈佑啟我

後人八章

皇帝御宇於茲八年於

郊於

廟對越有虔惟

列祖丕緒時予仔肩聿追厥

先敢曰遠而

皇祖有明憲予敢緩而肅奉

慈御龍婉婉而至德要道崇化本而九章

鸞旗晨發旭日杲杲山祗岳靈俟望

翠葆載飭我旅戢我徒圉分部徐驅毋躡我稷黍十章
爰歷古塞爰

駐山莊追維

祖德攄慕

天章

鑾輅東指藩服之履來迓來衛來庀儲侍

帝顧曰嘻毋汝勞只畲伏固請奔走趨俟

十一章

狩於平郊選徒不囂麋鹿獾獾有熊斯趨有虎斯嘯
天弧一發猛獸在庖諸蕃震愕相顧告語聞諸我先曰
聖祖神武永世追慕

今皇天威宛

聖祖重覩儀式刑

祖宗之德莫敢不服揚

祖宗之功莫不率從

十二章

言循三江言陟重岡自東徂西

三陵相望旖旎雲旂煜爚神光綏予孝孫

歆是孝享言逮功宗言徧羣神我

皇烝哉

章十三

言次

盛京路寢奕奕羣后肆朝會同有繹式宴式賚湛露滋
液施及陪貳游泳

皇澤

章十四

禮告備矣

德施概矣謏言還蹕敬我事矣於

廟告至拜

列祖明賜經途屢千經時累月如遊庭除靡戒靡蹶若
艾若稚扶攜走謁亶

列祖之詒繹時孝思於萬斯年介我純熙於萬斯年

我丕基

十五
章

聖孝光昭詩有序

德齡

大哉我

皇上之以孝治天下也孝德之著於政教者無一事不下愜於民隱孝思之展於祭享者無一念不上格乎

天心是以

郊社

宗廟之祀既已竭誠盡敬昭應特著近甸

陵寢歲必

躬奉

皇太后恭詣展視以申

思慕之情至於

列祖山陵在東土者道里悠遠

戒飭既備乃於乾隆八年秋七月卜吉上

陵

特命道由塞上以避禾黍在畝魚振旅大狩以講武事
是時秋霖正盛比

大駕將發

廟告之日天朗雲開羽衛啟塗常逢澄霽扈從之官下
至輿臺圉牧莫不踴躍歡欣外藩蒙古仰見

聖主神武

上天靈佑咸鼓舞震龍言輸誠效順惟謹

時邁所屆

皇上怡怡愉愉祇奉

皇太后起居

慈懷豫悅彌慶康寧暨至

園寢肅恭將事具禮有素

列祖格饗惟懌大典既成中外忭慶以為典禮之行
天心民志協應若此皆

皇上大孝至誠之所感召曠古以來實為僅見珥筆之
士無不咏歌盛事傳之無極臣職忝卿貳魚同大
學士臣陳世倌教習庶吉士分宜率先歌頌

上德謹獻四言詩一篇計一百韻言雖不文然事皆紀
實用述

聖孝之隆昭示四海焉

恭惟我

皇大孝備矣提虞挈周超邁曩軌孝以纘承篤懷靡已
孝以慎脩敬用五事孝以率由庶績咸底惟時惟康夙
夜顧諟有截政敷無垠化被萬邦協和一本推暨陶匏
繭栗式用

泰時對越惟虔報本返始於穆

清廟禮官既庀駿格無言苾芬柜桎赫赫

列祖雲蒸龍起肇業開基不堦尺咫率育疆界無有彼此

大統既集鎬由豐從武功載揚文德永矢有奕

山陵環

畿凝靄歲奉

慈寧敬恭展視景彼

留都高山天峙

橋山穀林鬱蔥佳只

聖祖繹思遠薦簠簋福祉既膺慶覃海濊巨典煌煌光
於

國史我

皇繼述以綱以紀

孝思維則心源一揆永言不忘大禮惟履

慈旨尤殷思齋任姒道遠惟勤既經既理乾隆八年維
歲在癸爰筮吉日肇修禋祀其時孟秋日次鶉尾霖雨
時行以汎以灑

皇帝乾乾有虔勿怠屆日告

廟雲開雨止

乘輿起行周道如砥清揚溥照林木曜綺

天心之格

至誠之恃志氣交應協於宮徵扈從謹謳蒸黎忭頌

帝念中疆彼畝糜芑

屬車紆路邊塞迤邐白草猶青暄霽千里爰

巡爰狩以閱武士七萃千旗星流電駛手格游騏足蹕

生兇雨血風毛谿谷填委

皇帝神武箭不虛指上殺中心乾豆是以旃裘萬帳爭
隨鞭弭或貢其獒或獻其雉搏心戢志奉觴拜跪罔不
震疊媚于

天子燕賞有渥以莫不救

帝奉

慈輿周覽遐睎翕河喬嶽有康

志體

行宮帳殿定省甘旨

慈顏載忻

聖情彌喜長白醫閭差峩峩岵岵環以鴨綠混同江水諸
陵宅焉萬福攸集九月吉日以次襄禮祠官備物瑤爵
玉几于豆于登用潔滌滌凝承

世德馨香澄醞

文母純純敬薦脯醢

孝思允展以介蕃祉

皇帝齋戒主茲望七優然愜然仰懷俯庇石馬欲驤王
衣常玼覲光揚烈洋洋如在緬昔先臣艱難共濟嘉彼
三勲

躬賜奠醴次者遣祭報厥功偉篤舊之

恩古未有比巍巍

盛京日晶霞蔚

御崇政殿以覲休采詆蕩門開小大拜稽宴錫需雲仁
敦行葦迺閱師徒鐳表壘迺犒迺資歡騰鉉鎧九天

作解書銜鳳嘴闔澤周流勤施表裏海宇霜澄闕門氣
紫迺旋

鑾輅告至

祖禰

皇帝之德惟孝永依大禮之成畢具諸美曰雨曰暘上
符

帝載被於四裔懷畏惟倍不匱之徵天人合啟

聖躬凝之翼翼疊疊兢惕有加

德業彌暉浸潤羣生淪浹肌髓載稽瑞牒朱草疑疑
德至山陵斯拱而俟

皇天永眷寵錫層累

天子萬年元元壽齒大有屢書萬億及秭臣齡作歌不
辭巴俚敬宣

聖孝以播遐邇

聖駕東巡

盛京恭謁

祖陵大禮慶成詩有序

劉綸

皇上御極之八載敬

天尊

祖誠民格神治具畢張大化翔洽仰惟

列聖東土肇基

陟降在庭之近俯念

陪京父老延頸舉踵喁喁望幸之誠迺以七月上旬

勅禮臣備

法駕恭謁

永陵

福陵

昭陵甚盛典也臣謹按詩誦發祥書陳觀德自昔豐功
駿烈莫不推本前歲如軒轅橋山顓頊附禺伊耆
穀林重華珠丘竝足集慶垂光用存景慕至考上
陵之禮祥於炎漢之年蓋以原廟衣冠寢園弓劍
先王所為創業垂統嗣世所由優見愾聞皆於是

乎在我

朝受符

上帝

聖人首出卜年卜世奕葉重光逮我

太祖

太宗篤祐凝庥鴻圖式擴梯航所屆悉主悉臣緬維遼
海神臯實鍾王氣建邦啟宇墨食於茲固已婉幽
岐而軼豐沛

世祖定鼎自燕

留都竝峙高山天作流澤孔長瞻望

龍興隩區松柏丸丸

寶城奕奕億萬禩昭假明禋之感是繼是承

聖祖在御時巡

躬親展謁隆儀疊舉所為志敬節具者備載史書

皇上世德作求肇稱殷禮諏辰夙事有翼有虔供奉

皇太后行則侍輦居則問

安敬愛兼摯

翠華所過秋宇澄霽川原彌望百昌成遂自從官以及
候吏遠近歡趨迺至諸藩後先輻輳周廬星拱蹕
蹕濟濟咸希鞞鞠蹕而進

萬壽之觴也古稱粉榆樂土詎足倫比惟時

聖衷淵穆按冊披圖於礪山帶河暇章胥集見規模之
閎遠焉於櫛風沐雨勝蹟依然見締造之艱難焉
於民物淳龐軍實整繕見古風之可愛而本根之

益固焉惟

天惟

祖宗眷念子孫臣庶俾以生成

皇上一體

天

祖之心治之是以升香瘞璧而肸鬯通舞德歌功而精

誠洽祀事既歲

垂裳當宁受羣臣朝

渙汗特頒小大稽首所以行

一人之慶所以合萬國之歡循古制也宗家法也昭錫
類也示懷柔也皇皇哉

大孝至仁備矣臣濫竽詞館夙効編摩伏觀

史宓金匱之藏

先猷炳煥有踰往牒茲復以職司輿僕恭遇

和鑒清蹕道左跪迎屬在工寮竝得陳詩紀盛竊未敢

以弇陋自解謹獻詩曰

我

皇踐阼纘

列祖之德有典有則是崇是式見於

郊

廟祇祇翼翼永言孝思維

丹陵是即

一章

天降大寶命眷時濬陽篤生

高后肇造厥邦闡門潭潭導我三江奄有九有耆定下

土方二章

天戈麾矣裨王撫矣閑閑禁旅陳樽俎矣業業寢成縣

簣虞矣繼繼繩繩百神是主矣

三章

皇綱帝紘歸我

聖神四十有八部面內咸賓暨使犬使鹿冠帶僣僣

帝曰欽哉維創守道均

四章

裸室兮露垂

齋房兮芝茁於昭兮

仁皇茂典兮是秩馳道兮弦開鎮山兮笏列笏列兮崔
嵬凝

景命兮延洪哉

五章

歲建亥兮星在柳

皇繩武兮澤單厚揚

德旌兮啟

文囿諧

璇宮兮奉

聖母迎鳩杖兮拜馬首稱上瑞兮

皇則有原田每每兮長禾被畝

六章

皇帝至止封樹來雲煌煌象設愾乎如有聞載羅鞞琫

載具典墳

先是列祖實錄

上命史館恭繕尊藏盛京

丕顯我下武繼序

我思文

七章

九功歌七德舞蠲剛日薦清醕

闕殿莪莪三光牖戶俄朶之城漠惠之野

叶

酌從龍兮

訖分虎蕭薌綢繆兮

皇受祜及我嘉師兮亦其福汝

八章

祠官告備迺慰迺宣曰敦本茂實維

聖所先訓練以時既精既研攷牧以時既蕃既便以迪

我四民服高曾之傳

九章

沐日浴月環滄瀛兮乾經坤絡開

上京兮井廬櫛比周原砥平兮弋山漁澤厥壤可畊兮

德產精兮萬寶成兮

十章

赫赫兮

王居洋洋兮

聖謨上賅兮雅頌下括兮京都繪天賦海兮

睿藻杼維洛宅有誥兮維邠原有圖

十一
章

遂開

明堂

聖人當陽

賜酺一日

賜爵一級爾祿爾糈

皇則予之爾絲爾粟

皇則復之及爾耆考曰饋之醕之及爾園嘉曰省之宥之


列祖之光維我

皇之慶叶時萬時億承

天之況叶十
二章



皇清文頴卷五十八



總校官庶吉士 臣 張能照

校對官檢討 臣 王鍾健

謄錄監生 臣 王心仁

財團法人
佛陀教育基金會
釋淨空
敬贈

